

兩
浙
名
賢
錄

兩浙名賢錄卷十二目次

翊運

明

誠意伯劉伯溫墓

翰林學士宋景濂墓

御史中丞章三益墓

子存道附

南昌府知府葉景淵孫

徵辟貢薦附

王府參軍胡仲淵孫

翰林學士王子克碑

長史桂彥良德稱

鞏昌知府劉士原性傳

祭酒梁叔亨貞

教授胡仲申翰

尚寶少卿陳如晦顯道

汪仲山仁壽

訓導徐君善原

行部侍郎劉伯靜辰

子敬附

慈利縣丞汪益民

刑部尚書錢惟明唐

濟南知府方去矜克勤

國子祭酒陶中立凱

廣東參政諸葛伯衡

國子監助教員延琚瓊

四川左參政宣彥溫溫

太常博士陳世昌

國子司業王原禮嘉會

文華殿大學士鮑仲字恂

長史朱伯清燕

宋無逸玄僖

教諭趙樞讓讓

國子博士錢子予宰

監察御史周觀政

潁上縣知縣車信夫誠

江西僉事丁叔寬像

子麟附

國子學正王彥貞桓

同知劉昭甫子華

子鏐從孫棟附

右副都御史韓伯時宜可

王教授俊華

福建僉事謝原功肅

知府胡斯美惟彥

子伯順附

教授崔斯立植

黃岡縣知縣徐宜叔諡

教授俞景淵深

兵部侍郎徐宗實屋

訓導趙德純宜生

陝州判官梁仲

舉

教授徐大章一葵

左布政王希陽燾

兩浙名賢錄卷十二目次終

兩浙名賢錄卷之十二

東海徐象梅仲和氏謨

錢塘翁望之在遺氏閔

翊運

明 四先生

誠意伯劉伯溫基

劉基字伯溫處州青田人少穎悟絕羣讀書過目輒誦
善經學工屬文旁通天官陰符家言元末舉進士授瑞
州高安丞故秘書監揭傒斯見而奇之曰子魏玄成流

也。而英特殆過之。應行省辟與幕僚議不合。投劾去。再補江浙儒學副提舉。克考官。復論御史失職。受臺抨。再投劾歸。乃與魯道元字文公諒。日縱酒呼博。游武林。泛西湖。見異雲起西北。衆皆謂慶雲。方分韻赴詩。基獨引滿不顧。曰。此天子氣也。應在金陵。十年後有王者起。其下我當輔之。西蜀趙元澤復奇之。曰。公乃受魏玄成目耶。非諸葛武侯未易當耳。時方國珍反海上。省憲舉基爲行省都事。谷珍知不能抗。乃使人浮海至燕。以重賂賄元用事者。下有司招撫授谷珍以官。基言賊弱易與。

今不除乃厚撫之益長賊計用事者以先入谷珍賂大怒謂基失天子憫念元元至意當斬乃羈管紹興路基感憤痛哭流血欲自殺賴門人密理沙力阻得不死自是放浪紹興諸山水間多爲詩歌以自適而谷珍益橫肆不可制盜所在蜂起行省乃復以都事委基基受兵且撫且討寇悉平是時石抹宜孫爲樞密院判負義幹基與之相犄角軍聲大振自樞密經歷遷行省郎中而用事者右方氏僅以基故儒學副提舉資遷總管府判基旣左轉又兼兵乃納告身庭中拜曰臣不敢負世祖

皇帝無所措足矣。遂逃歸青田山。著郁離子十卷以見志。衆避谷珍多。依基自保。會太祖已下金華。定括蒼。基置酒延客。指乾象示之曰。此豈人力也邪。會上使孫炎以金幣來聘。基乃付其衆於弟囑曰。衆善保境。毋爲方氏所窺。卽日同章溢葉琛間道走金陵。且謂溢琛曰。吾昔日西湖之言驗矣。旣見上。陳時務十八策。上大悅。俄陳友諒傾國人寇。壓金陵。軍勢張甚。上欲發兵禦之。而衆恒擾不決。有請背城借一者。有以鍾山王氣請奔據者。有勸納款者。基後至。獨張目不言。上

爲起人內起召基基言先斬主納款及奔鍾山者上
因問計將安出基曰賊驕矣誘之深入而伏兵激取之
故易易耳取威定霸在此舉而言納款及奔何也上
於是決策誘破友諒盡覆其衆以克敵賞酬基基辭不
受上雖已定江東稱吳國公而中書省設小明王座
猶奉韓林兒基怒罵不拜曰何爲奉牧豎者爲上陳
天命所在上感悟始定征討大計師攻友諒之皖城
不下基謂彈丸地何足久勞師友諒膽破矣急進薄江
州彼必遁江州下皖城焉往友諒果遁都督馮勝攻其

城上使基授之方略。基以一赫蹏封。曰：夜半出兵。至某所見某方青雲起，卽設伏。頃有黑雲起者，賊伏也。勿輕動。日中具而黑雲微薄，回與青雲接者，賊歸也。銜枚蹀其後，擊之可盡擒也。勝啟讀亦未敢信。已而青雲里雲起，具如基言。遂奉而破賊，取其城。友諒之丞相胡廷瑞者，使其子請以洪都降。有所要質。上難之。基從後蹴所坐胡牀。上悟許之。洪都乃下。前基以母喪告歸。上因留不得行。至是復申前請。始許。基至衢而苗軍叛。殺金華搭蒼守將胡大海。耿再成等衛人洶洶。其將夏

殺憂甚迎基入衆卽帖伏基爲移書諸屬邑俾固守候
邵平章之兵而悉誅諸叛將基治葬畢因騰書宣上
威德以示方氏方氏遂請降俄驛召還道建德而張士
誠來寇李文忠時爲帥奮欲擊之基使勿擊曰三日後
必走走而尾之可盡擒也三日基登城望曰賊走矣衆
見其壁壘旗幟如故且聞嚴鼓聲莫敢發基復起之至
其所則空壁所留皆老弱追而迫之東陽悉獲其衆基
入謝上從容問曰吾欲取陳友諒張士誠而鯁生謂
士誠密邇且富而弱宜先若爲我策之基對曰陳氏據

上游竊名號乃心無目忘我此不宜久蕞崇之取陳氏
則士誠囊中物矣會友諒復攻洪都上遂率師迎敵
之大戰於彭蠡湖雖小利尚未決基請移軍湖口以金
木相犯日決勝陳氏遂平置太史令秩正三品基領之
時日中有黑子基言東南當失一大將俄而參軍胡泚
伐陳友定敗沒上方欲刑人而基適入亟語之夢以
頭有血而土傅之故欲應以刑基曰頭上血衆也傅以
土得衆且得土也應在三日上爲停三日待之而海
寧降上大悅悉以所停四付基縱歸里熒惑守心羣

下皆惴惴以 上且有所加僇基密奏宜下書罪已以
回天意 上許之衆乃安大旱 上特命基諗滯獄甫
決雨隨澍時基最爲 上所信嚮所言無不聽 上卽
位擢御史中丞領太史令如故遇諸大典封賞冊拜皆
基與左丞相李善長學士宋濂計定行之時處州七縣
糧當加於宋歲額五升而 上獨令青田僅以五升爲
額曰令鄉里子孫世世頌劉伯溫也時左丞相李善長
貴盛基獨事與抗議不相下善長不能平適善長以事
見譴憲使凌說因彈之基言善長舊勲且能輯和諸將

上曰是數欲害汝汝乃爲之地邪汝忠烈足任此基顛
首曰是如易柱必得大木乃可若束小木爲之將速傾
覆臣駑鈍豈堪此 上乃欲相中書左丞相楊憲復問基
基素與憲善對曰憲有相才無相器又問右丞相汪廣洋
基曰此褊淺殆甚於憲參政胡惟庸何如曰用之儼然
破犁犢也 上曰吾固難之吾之相終無逾先生者基
對曰臣非不自知臣疾惡太甚又不耐繁劇 上不悅
而罷其後憲以怙寵廣洋以異懦惟庸以大逆皆不良
死會 上幸鳳陽基與左丞相居守請於 上曰宋元

以寬縱失國且今刑亂用重必使網紀肅而後惠政可施乃飭諸御史一切按劾權倖無所避中書省都事李彬坐貪縱見法丞相以彬省僚且素暱之請基緩其獄基不聽獄具馳奏報可卽斬之丞相大恚恨俟上歸訢基盛夏祈雨僂人於壇壝之下非所以奉承天意上惜基持其章不下而風基以病請告就醫青田時洪武四年也時上再幸鳳陽有欲建中都之意又銳欲出塞滅王保保基瀕行疏言中都曼衍非天子都王保保雖遁荒漠不可輕明年大封功臣手詔叙基勲伐

召赴京命兼弘文館學士已封其祖父皆永嘉郡公乃封基開國輔運守正文臣階資善大夫上護軍誠意伯又明年復予告歸里基既歸猶上章問起居撰賀平蜀頌上優詔答之嘗爲上陳旣閩事蓋旣括之間有隙地曰淡洋其南抵閩界曰三魁爲離盜藪方氏所由亂基奏於其地立巡司以控扼之其奸勿便也相率挾逃戍之卒以叛太豪復陰主之基時使其子璉上奏而不先白中書省胡惟庸左丞相事銜基舊語使刑部劾基欲購淡洋地爲自墓不得則創立司之說以窘其

人致激變。疏上不問。復請逮其子璉。又不問。而第令移文使基知。奪其祿。伯爵如故。基馳入朝見。上但引咎自責。不敢復言歸矣。惟庸俄代廣洋爲右丞相。覘上之視基怠。乃陽爲好者。以八年正月朔。挾醫來視疾。基飲之。再覺有物積胸中。如拳石。又三月。寢劇。上使問之。知不能起。乃爲文以贈。給驛舟。護歸青田。亡何竟卒。年六十五。基且卒。以生平所習。天文秘書。封授子璉曰。服闋。亟上母。令後人習之。爲書勅。上修德省刑。祈天永命。且寬猛若循環。毋持一端。諸形勢要害之地。宜宿

重兵與京師形勢相連絡授其次子仲璟曰惟庸方在
事上之無益不久必敗敗則上必思我其時可密聞
也基爲人剛毅有大節慷慨敢言遇天下利害果殺奮
發不復反顧而揣摩事計多中其於天文尤懸斷不爽
若鬼神初上禮重之呼老先生而不名又時時謂人
伯溫吾子房也洪武十三年上誅左丞相胡惟庸等
果復思基言召其子璉拜考功監丞遷江西右叅政蚤
卒二十三年召璉子鴈復故封誠意伯歲祿五百石予
世襲二十五年卒子法幼而璉弟仲璟奏基疏拜閣門

使遷谷王右長史靖難兵至谷王開金川門降而仲璟獨不屈下獄法亦停襲法子樞孫曇曾孫祿至景泰中上思基功授世襲翰林五經博士子憲前卒孫瑜至弘治中因給事中吳士偉言晉授處州衛指揮使正德九年賜誥曰劉基學爲帝師才稱王佐孔明之任豈間人言敬與之謀不負所學占事考祥明有徵驗運籌畫策動中機宜渡江策士無雙開國文臣第一受爵能讓懷辟金蹈海之風成功不居從辟殺封留之請可謂明哲允矣清貞特贈爾爲太師謚文成嘉靖十八年刑部郎

中李論言故誠意伯劉基宜配饗高廟世其封爵如

徐達上是論言下廷議皆言高祖收攬賢豪創造

基業一時佐命功臣並軌宣翼而帷幄奇謀中原大計

每每屬基故在軍有子房之稱剖封發孔明之喻基亡

之後孫應實嗣之太祖嘗召論再三鐵券丹書誓言

世祿應嗣未幾旋即隕世祿主裳於末裔委帶礪於空

言或謂後胤孤貧勿克負荷或謂長陵紹統遂致疎

嫌雖一辱塗泥傳聞多謬而載書盟府績效具存昔者

武王興滅天下歸心成季無後爲善何勸基宜侑饗

太廟其九世孫拈樞使瑜宜嗣伯爵伏惟 聖明裁定
制曰可基入祀 太廟廡中瑜嗣誠意伯食祿七百石
與世祿二十年瑜卒子世延嗣

楊文懿守陳曰子房不見詞章玄齡僅辦符檄先生勲
業造邦文章傳世可謂千古人豪或疑先生逮事胡元
專門象數何異管伊尹之屢就恨周公之多藝也方

上手書問天象先生條答言霜雪之後必有陽春今國
威已立自宜少濟以寬或言有殺運三十年者先生慨
然曰使我任其事掃除弊俗一二年後寬政可復嗟乎

先生之自任者何如而卒中譏毒以死也豈天之不欲
遽開太平乎彼世所傳難星已過勸上急移他舟者
特星官之一技耳惡足以盡先生又惡足爲先生重哉

翰林學士宋景濂

宋濂字景濂浦江人妊七月而生六歲能詩歌稍長文
學名益著初爲翰林國子編修辟入龍門山著書與子
徵至金陵見上問世亂柰何對曰願明公不嗜殺人
除江南儒學提舉授太子經壬寅召講春秋左氏傳
濂曰春秋孔子褒善貶惡之書遵而行之賞罰適中天

下可定甲辰改起居注侍左右明年侍上諭黃石公

三略濂曰尚書典謨帝王大經大法靡不畢具願陛下

留意又明年乞歸省賜金帛太子贈有加還家箋謝

上書太子願進修德業上覽書喜召語太子其

意洪武二年徵總修元史除翰林學士知制誥時甘露

屢降上召濂賜坐上躬執金杓煉湯於鼎以甘露

授之手注於卮語濂曰此和氣所凝能愈疾延年故與

卿共之耳因問灾祥之故對曰受命不於其天於其人

休符不於其祥於其仁上嘗言古帝王富宴安之餘

多好神仙。朕謂國治民安。心神恬泰。卽神仙也。對曰。漢武帝好神仙。而方士至。梁武帝好佛。而異僧集。使移此心。以求賢才。天下有不治乎。三年。坐議孔廟禮謫。安遠知縣。未幾。召爲禮部主事。五年。陞太子贊善大夫。上立取問。帝王宜讀何書。濂請讀真德秀大學衍義。上立取覽。悅之。令大書揭兩廡壁。六年。上坐西廡。賜大臣坐。令濂講大學衍義。司馬遷論黃老事。講畢。復言曰。漢武帝嗜神仙。好邊功。民力旣竭。譬以重刑。幾至大亂。人主能以禮義養性。則邪說不能侵。興學教民。則禍亂不能

作刑罰非所先也。上曰：朕上畏天地，下畏兆民，兢兢業業，不敢自逸。瀛離席頓首曰：願皇上慎終如始，天下幸甚。陞侍講學士，兼贊善大夫，令集歷代姦臣事爲辨姦錄，分賜太子諸王。又命序祖訓纂，大明日曆七年日曆成，又擇言行之大者爲寶訓，爲序上之。瀛侍上又多所陳說，不務文飾。上喜曰：卿可參大政。對曰：臣少無他長，徒以文墨議論事。上一旦受職任事，不效，負陛下頓首力辭，每燕見，坐賜茶，詢舊章，講治道甚條析。至問廷臣臧否，第言其善者，瀛深審不津禁中語。

有奏輒焚稿嘗書溫樹二字室中或問朝廷事指二字不對或命賦詩爲文必寓忠告嘗奉制詠鷹令七舉足卽成有自古威禽荒之語上忻然曰卿可謂善諫矣上嘗強瀟飲醉惟笑賦楚詞一章令羣臣咸賦醉學上歌曰今後世知朕君臣同樂也九年除翰林學士承旨知制誥兼修國史上曰朕自布衣爲天子卿自草萊列侍從爲開國文臣之首俾世世與國同休不亦美乎令太子選賜瀟良馬又爲良馬歌賜瀟時有上萬言疏者上怒其迂衍罪且不測問羣臣阿意者輒指

其疏此不赦此詆誅罪當誅召問濂對曰彼應詔上疏
本效忠無他烏可深罪上復覽疏顧有足采者召歸
阿意者曰若等激吾怒何異以膏沃火向非宋景濂幾
不誤罪言者上嘗延譽濂曰古人太上爲聖其次爲
賢爲君子若景濂事朕十九年口無毀言身無飾行寵
辱不驚始終無異不謂君子人乎匪惟君子抑可謂賢
矣十年致仕賜錦綺御製文集太子贈衣三襲上曰
朕最慎賞嘉卿忠誠貫金石故以賜卿卿今年幾何曰
六十八上曰義此綺三十二年作百歲衣濂頓首謝

漁樵請歲一朝是年九月入朝上廷問漁樵及至大喜日侍上游歷觀關盤旋禁蕪便殿侍食日晏始退上歎曰純臣哉爾漁方今四夷皆知卿名卿自愛漁遜謝不敢當歲暮辭還既行數日上語漁子璉曰朕疇昔之夜夢爾父笑談如曩時璉曰非陛下垂念臣父切至何以形諸夢寐漁嘗曰古人爲學使心正身修措之行事俯仰無愧而已繁辭復說道之蔽也尤篤於倫品與人交和易任真內誠外恕一見信服汲引後學如恐不及平居布衣蔬食無異舍士或勸爲子孫計曰

富貴一家物哉我乃所以遺之也。身少至老未嘗一時去書。致仕居青蘿山。閉門纂述。人不見其面。日本使奉勅請文獻百金。卻不受。上問濂對曰。天朝侍從受小夷金。非所以崇國體。十三年冬。孫慎坐法論死。濂罪且不測。太子力救得釋。安置茂州。十四年五月行至夔。卒。年七十三。門人方太史孝儒曰。當元之衰。國朝始興也。地大兵彊。據名號雄視中國者十餘人。皆莫能得士。太祖定都金陵。獨能聘禮太史公公始見。卽勸不嗜殺。人論道。上前授經。太子未嘗不言仁義。天下既定。

上方稽古制治。凡郊廟山川祠祀律曆禮樂夷裔貢貢。諸禮文大政皆太史公裁定。太子寬大仁明天下歸心愛戴太史公之功居多。海外諸國朝貢接國門至必問太史公安否。漁墓初在菱永樂十一年孫恪以蜀獻王命遷葬華陽置祀田。正德中追謚文獻。漁二子長瓚瓚子三人慎愷恂皆無後。次璉爲中書舍人子三。懌愷恪居華陽懌字子夷奉母孝獻王時賜粟帛懌力學攻書建文君召懌入翰林爲侍書。

御史中丞章三益謚

子存道附

章濫字三益龍泉人壬辰斬黃妖寇犯龍泉執濫從子
存仁濫憐存仁幼願代之賊聞濫名大喜問計濫正色
曰若等皆有父母妻子顧爲此滅族事賊怒并執濫濫
給守者乘間脫歸集里中少年擊却賊上功行省授龍
泉主簿辟結廬匡山又避地入閩庚子 上徵濫及劉
基宋濂葉琛三人至建業 上曰我爲天下屈四先生
今海內紛紛何時定乎四人者齊聲前對曰惟不嗜殺
人者能一之 上悅擢濫僉管田司事巡行江東兩淮
濫乞省母病賜金綺歸留子存厚京師浙東始設提刑

按察司。溢爲僉事處州。總制胡深出師溫州。還。溢守處
州。給餉平。荆。營移。僉事湖廣。荆。襄多廢地。議分兵屯田。
且控制中原。上善溢言。河內按察使宋思顏。浙東按
察使孔克仁。僉事王璘。坐法。辭連溢。憂懼。上曰。予素
知溢守法。毋恐。胡深兵入閩。陷沒處州。幾變。陞溢浙東
按察副使。鎮處州。溢辭曰。臣往任浙東。無狀。蒙恩。獨原。
卽陞臣官。罪過益重。疆場之事。臣死不避。副臬之命。敢
辭。上從之。比至。諸山寨已叛。溢宣布詔旨。軍民感悅。
誅首叛者。餘悉解散。青田。福建寇。合攻慶元。龍泉。溢守。

集却賊茗陽賊寇隣邑。遶平陽瑞安傳道。溢令子存道
合平瑞兵禽賊水軍千戶任惟淵。朱仲欽戍青田。賊至
仲欽遁。戰惟淵走。仲欽以無援故敗。溢卽斬惟淵以徇。
温州平。請朝京師。上曰。卿在邊良苦。待平吳卽召卿。
浙西諸郡平。乃召溢。且命分兵征閩。以存道守處州。溢
入見。上諭羣臣曰。溢雖儒臣。父子宜力一方。寇盜盡
平。功不在諸將。後因問溢征閩諸將對曰。湯和由海道
進。胡廷瑞自江西入。此必勝矣。然閩中尤服李文忠。威
信若令文忠率師從浦城取建寧。則萬全計也。上立

詔文忠出師如濫言。溫賊既降，乃授濫元帥，還守之。先是，我師征溫，失利，輒叛去。溫既平，又請降。濫曰：「叛而復降，納之無法。」奏斬賊。洪武元年，拜御史中丞，尋薨。太子贊善大夫濫，務存大體，不屑細故。或以爲言。濫曰：「憲臺百司儀表，居其職者當先養人，庶耻使避不犯，豈直搏擊爲哉？」上祀社稷，大風雨，還坐外朝，大怒，議禮者得罪，且不測。濫曰：「風雨連朝，無足爲恠。」卽禮官失議，皇上誠敬自足，昭格願賜寬霽，事遂已。存道部鄉兵萬五千，從李將軍平閩後，復詔存道兵從海道北征。濫曰：「鄉

兵本農人。始令征闖許事平歸農。今復調北征。棄信不
可。上不應。濫曰：兵已入闕者，俾還州里，昔嘗叛逆者，
宜籍爲軍使，北征自贖，則一舉而恩威著矣。上曰：孰
謂儒者迂？先生強爲朕一行。濫至處，乞終母喪，不許。遣
存厚還治喪。濫集鄉兵，令存道部出永嘉浮海北行。三
上章乞終喪，得允。存道出崑山，走京師見上。授處州
衛指揮副使。皮上黨尋移平陽，指揮同知濫喪母，哀毀
疾作。二年卒。濫性孝友，誠確宏偉，外若和緩，至臨大事，
議論爭是非，不避權勢，必折衷於理。存道征陽和遇虜。

於斷頭山力戰死

南昌府知府葉景淵琛

葉琛字景淵處州麗水人博學多文少與劉基章溢齊名元季兵亂從處州守石抹宜孫討寇有功授行軍元帥太祖聞其賢遣使以幣聘之與劉基章溢宋濂三人同至金陵進見上喜賜對皆呼先生而不名四人者出上目送久之顧問左司郎中陶安曰四人者何如安對曰臣謀略不及劉基學問不及宋濂治民之才不及章溢葉琛皆王佐才也而殿下一旦以禮爲羅而

之天下不足定矣。上大喜，擢琛爲營田僉事。壬寅正月，上帥師至龍興，守臣祝宗、康泰以城降。改龍興爲洪都府，尋改南昌。以琛知府事。旣而宗、泰復據洪都，叛琛迎戰，死之。事聞，上嘉其忠義，追封南陽郡侯，命有司立廟南昌，歲時祭之。

徵辟貢薦附

共四十人

王府參軍胡仲淵、深

胡深，字仲淵，處州龍泉人。天資學識出人而尤精弓馬。元季石抹宜孫總戎處州，以深爲參謀。緡松遂麗等縣

民亂爲盜，深悉討平之。己亥，胡大海兵取處州，石抹宜孫戰敗，大軍分取屬邑。深知天命有在，乃解甲見大海於軍門，悉上四縣版籍，兵不血刃而屬縣皆下。上聞而賢之，召深至金陵，擢中書左司員外郎，卽命深總制處州兵事，諸暨守將謝再興叛，兵犯東陽，李文忠擊走之。胡深引兵爲援，議爲城守，無何而浙西將李伯貞大舉入寇，以城堅不可拔，敗績去。上念深守城功，以名馬賜之。青田葉仲賢旣服，又叛，溫州方明善攻我平陽，深悉出偏師討之，而親統大軍攻溫州。明善勢感，與其

仲父谷珍議納歲幣繼以揖若平來貢深尋入覲上
時已稱吳王乃擢深王府參軍仍總制處州陞辟上
曰侯國浙盡平當還汝中書乙巳福建陳友定擾邊深
奉命征之建守將阮德柔兵屯錦江深進擊之破其寨
柵友定大懼率銳卒急圍我營深突陣與戰馬蹶被執
友定頗加禮遇深具道天子仁聖援實融故事感之
友定初無殺深意會元使至督迫之遂跨銅驢烈焰而
死年五十二時太史劉基見日中有黑子奏曰東南當
失一大將深果敗歿上痛悼不已親撰文遣官祭之

追封緒雲郡伯。上嘗問宋濂曰：深何如人？對曰：文武才也。上曰：誠如卿言。浙東一障，朕方賴之。深有二子：長賴，次樞。樞授宣武將軍、處州衛指揮僉事。

翰林待制王子克禕

王禕字子克，義烏人。幼秀爽，竒敏。及長，長身玉立，屹有偉度。習古學，師事黃文獻潛。時文獻爲文章，宗工天下所師。仰然性介，特慎許可。見禕所業，獨深器之。卽屬以斯文之任。時元末政亂，禕乃攬天下事勢，爲書七八千言，上之。時宰嫌其切直，格不以聞。危素、張起巖並薦不

報時有齊琦者明數學推言天人興衰甚驗見禕歎曰
子克異代人物也禕亦知世道終不可爲乃歸隱青巖
山中著書深自韜晦若將有所待者戊戌高皇帝親
取婺或以名聞遣使徵之禕幡然喜曰吾聞大亂極而
聖人出齊琦之言良足徵乎卽日詣行在上見大喜
署中書省掾商略機務上每稱子克而不名間與論
文章稱善因命採故實爲四言詩授太子辛丑進平江
西頌上覽頌喜曰吾固知浙東有二儒卿與宋濂耳
學問之博卿不如濂才思之雄濂不如卿癸卯授江南

儒學提舉司校理外艱服闋除侍禮郎兼引進使時當
創國之初禮制多所裁定遷起居注丙午出知南昌府
禕披榛莽建府署撫瘡殘集徙散收廩賢士搜除奸蠹
經理廢壞郡得安輯賜黃金帶以寵勞之丁未召讓卽
位禮忤旨洪武元年降漳州府通判尋上䟽言上天以
生物爲心雷霆霜雪有時而搏擊有時而肅殺然皆暫
而不常向使雷霆霜雪無時不有則上天生物之心息
矣二年召修元史爲總裁官禕史事擅長裁煩剔穢力
任筆削書成拜翰林待制同知制誥兼國史院編修官

三年預教大本堂。禕經明理達善開導。每召對殿庭。必賜坐。縱容宴語。未久。奉使土蕃。尋召還。五年。以翰林待制副蘓成詔諭雲南。命下。廷臣危之。禕欣然就道。六月。抵其境。見梁王君臣。論之曰。皇明創業。統一萬方。惟王僻在西南。未被聲教。天子不忍鄙夷。命禕輯寧爾邦家。若能亟奉版圖。以歸職方。則身名俱存。不亦偉乎。不聽。館禕別室。然以禕名儒。雅敬之。越日。禕又論之曰。朝廷軫念雲南黎庶。不忍盡戮。故令使臣開諭。若旅拒不服。自遠恩化。必奉行天討。命秦甲發蜀。殲循。棧道略。

沉黎而西大將軍踞昆明之上而飲其水犄之角之腹背受敵王之將佐利王以爲功者不少雖欲泥首牽羊其將能乎王曰漢閉昆明命使莫達唐勤遠略祇以自憊天朝若以兵臨雲南金碧以爲城昆澤以爲池雖多無所用之禕曰王未聞乎自天地構難友諒據楚士誠據吳友定據閩王珍據蜀彼皆重關峻嶺長江天塹險於金湯况兵糧委積淵謀盈庭孰不欲長雄天下以與天地同悠久乎不四五年幸膏鈇質雖爾元君北走以死橫廓帖木兒輩賣降恐後往事具在可鑒也今王自

度謀勇悍遂孰愈誠諒兵士利廣孰愈中國度德比義孰愈天朝推亡固存孰愈天命天之所廢誰能興之天之所與誰能禦之今以區區一隅之地逆天犯順與天下抗爲此謀者不亦誤乎王曰先生之言是也請姑就館吾其圖之會元之遺孽有自立於朔漠者遣使脫脫欲連兵以拒脫脫至察梁王有二心欲迫殺我使以固其意梁王持兩可不決匿禕於民間脫脫聞之謂讓梁王不得已出禕與脫脫相見脫脫欲屈禕禕罵曰天訖汝元命我朝實代之汝如燭火餘燼尚欲與日月爭光

邪我將命遠來豈爲汝屈有死而已顧梁王曰汝朝殺
我大兵旦夕至六年十二月竟被害瘞地藏寺北年五
十二二子曰綬曰紳裨慷慨有奇氣人初見之若不敢
卽及一言之入則情誼藹然恨相知之晚於經史百氏
無不究其極其爲文宏麗沉雄機軸貫綜自成一家言
天下士大夫爭傳誦之所著有華川前後集玉堂雜著
續東萊大事記各若干卷藏於家裨事 上十餘年服
勤報效左右開陳非仁義之言弗道也教子慈而有法
在官還書教之曰寧人侮我毋我侮人故二子克自樹

立皆能世其家學。禕歿後八年大兵平雲南。又十五年次子紳往求遺骸不獲。因訪得禕死所。擗踊號呼。製神主載回。因上書言父死節狀。下翰林議。贈翰林院學士。奉議大夫。謚文節。正統六年又贈翰林學士。更謚忠文。長史桂彥良德稱。

桂彥良名德稱。以字行。慈谿人。記誦敏捷。及聞楊簡學。益以尊德性爲本。仕元爲教授。因朝政不綱。退隱田里。高皇帝召見。特授太子正字。賜宴與公侯列坐。日侍講讀。上詔詞人賦詩賡歌。彥良每先衆而就。嘗進奏曰。

治道具在六經典謨訓誥願留聖意詩非所急也。上
深然之。自是恩遇隆洽。稱曰老桂而不名。上嘗御大
本堂。彥良與秦府紀善林溫入見。上問之。各以官對。
上謂彥良曰。卿帝者師。謂溫曰。卿王者師。其各自重。彥
良感荷。知遇知無不言。每侍講。必以二帝三王爲本。而
折衷於孔孟。要以明聖學。格君心爲務。至於歷代治忽。
啟迪不倦。誠意懇至。凡所陳說。無一不當。帝心。上
方以法繩下。訪曰。法數行而數犯。柰何。對曰。用德則佚。
用法則勞。法以靖民。則民勞。而弗靖。德以靖民。民亦靖。

於德矣。上深然之。洪武八年特授通奉大夫。督相府右傅。上親製手詔以孔孟諭之。陛辭。上曰。江南大儒惟卿一人。彥良謝曰。臣不如宋濂劉基。上曰。濂文人耳。基峻隘不足取。既侍王就國。日以正大之學輔之。王以絳衣鞍馬。畫彥良像以賜。後諸王府罷相府。改彥良爲長史。時彥良已老。王爲造安車。奏令致仕。彥良退。作存養省察圖。以進。王揭諸座右。以時觀省。居無何。詔彥良舉家還京師。彥良條陳治道所急者曰。法天道。廣地利。順人心。養聖德。培國脉。開經筵。精選舉。審刑罰。敦

教化馭戎狄。蒐賢俊。廣咨訪。凡十二事。總名曰萬世太平治要策。上嘉納之。以風疾賜歸。卒於家。所著有清節集、清溪集、柱笏集、老拙集、和陶詩、春秋詠。傳於世。平生見道純一。不以貧富動心。仕止進退。一委於義命。與人交坦坦夷夷。命觴賦詩。踔厲風生。窮日夕不厭。時以春風和氣目之。

肇昌知府劉士原性傳

劉性傳字士原。嵯人。元季兵起。散家財。聚兵以捍鄉邑。號義兵萬戶。高皇帝駐蹕金華。遣人召之。性傳即率

衆歸附比見首陳匡國安民之策數千言稱旨拜中書
門下侍郎固辭改陝西鞏昌府知府鞏昌地隣北虜民
物凋弊性傳撫輯軍民恩威並著邊境以寧國初屈指
良牧者多以性傳爲首

祭酒梁叔亨貞

梁貞字叔亨新昌人舉元鄉試授太平路教授端毅寡
言深沉有識高皇帝克太平貞率諸儒迎拜請戢軍
士以安生靈復以三王之得天下者爲言上深然之
留掌圖書與李善長同侍帷幄參密議上欲取金陵

謀諸貞貞力贊之。命都事江南行省遷湖廣按察司。食
事兩浙轉運使。未幾拜太子賓客。日侍大本堂。多所啟
沃。戊申以本官兼國子祭酒。國子諸科條皆貞所規畫
也。嘗輯古詩三百篇進覽。上以賓之初筵命丞相直
解。喜悅感歎。命繕寫數十本。頒賜大臣。俾朝夕警省。後
以老乞歸。築墅鼇峯之下。日與里中諸宿儒相賡唱。超
然以榮名終。

教授胡仲申翰

胡翰字仲申。金華人。自幼聰睿。志氣異羣兒。七歲拾遺

金道中守不去候遺者至而還之長從吳師道授經從
吳萊學古文辭又登許謙之門獲聞考亭相傳的緒持
其所業就正於柳貫黃潛張樞咸以致遠器之嘗出游
元都徧交當世名卿而於武威余闕宣城貢師泰尤號
知己遭時不靖避地南華山中著書宋濂稱其奇邁卓
越務師古人出言簡奧不煩而動中繩墨如夏圭商敦
望而知非今世物也太祖定金陵遣使召見會有請
以金華民籍田出兵者翰言民不習軍旅徒費廩粟爾
上可其言罷之除衢州府學教授洪武乙酉奉旨纂修

元史書成賜白金文綺辭歸卜居長山之陽學者稱曰長山先生卒年七十五所著有春秋集行於世

尚寶司少卿陳如晦顯道

陳顯道字如晦東陽人好學明經旁通天文地理律曆兵機試鄉闈不售輒棄去謂人曰大丈夫要當以勲業垂名竹帛安能與羣兒爭長於鉛槧間邪元季兵起散家財結義旅以衛鄉井戊戌高皇帝下婺城駐蹕赤松官顯道詣謁陳濟世安民之略留置左右參決大事時方谷珍據台州明越未下特命顯道往諭至則谷珍

納款 上賜顯道手札及和其詩以寵嘉之復遣諭谷
珍兄弟納土人覲歷官至尚寶司少卿以忤旨出爲臨
洮知府俄召還復職卒 上甚悼之命有司造墳護喪
歸葬

汪仲山仁壽

子羽附

汪仁壽字仲山金華人性穎悟善記覽經史百家靡不
窮究尤明於性理之說王師下婺同許元葉瓚胡翰等
召見會食省中日令二人進講經史敷陳治道所著有
靜齋稿若干卷子羽能繼家學詩詞俊雅與呂肅陳誠

汪旻爲文學交人稱四友

訓導徐均善原

徐原字均善與吳沉同鄉爲文字交原博覽羣書而尤精經學元末隱居不仕太祖兵下婺州改爲寧越府命知府王宗顯開郡學以教民之秀異者乃聘儒士葉儀宋濂爲五經師戴良爲學正吳沉徐原爲訓導時喪亂之餘學校久廢至是始聞絃誦之聲原歷主福建江西考試以得人稱文學不在吳沉之右而位不通顯竟以訓導終論者惜之所著有五經講義強學齋文集若

千卷

北京行部左侍郎劉伯靜辰

子徵附

劉辰字伯靜金華人慷慨負氣節善談論喜功名天兵下婺城辰首上謁署爲典籤奉使方谷珍谷珍令左右飾二美女以進辰峻却之谷珍歎服遂傾心輸納左丞李文忠開省於嚴辟辰參其軍事大將葛俊守廣信賞所寒集丁夫濬城濠民苦之將爲變文忠止之不從大怒欲臨之以兵辰請往諭以大義俊悔聽命事遂解以親老求歸養未幾父母繼歿執喪哀毀薦起爲湖廣道

監察御史立朝蹇諤遇事敢言權知鎮江府興廢舉墜
勤於其政郡有濱江田八十餘頃歲淪沒仍責賦於民
爲請於朝除之京口開廢舟楫不通東南漕運者轉新
河江陰二港以出江多爲風濤阻滯辰乃自京口至呂
城百二十里去淤塞甃石作壩修閘門順水勢之出入
於是公私便之然漕河源淺易涸每仰練湖以益水湖
有三斗門亦廢辰又修築之三斗門成漕運之舟旣通
湖下之田益稔丹陽道接句容民負任者往往因日暮
劫商旅患之辰嚴爲禁約盜遂息永樂元年召修

高廟實錄凡當時戰伐克捷之功宿將舊臣有所不能盡者歷歷言之聽者如身在其時目覩其事考之注記無不懸合書成超拜江西布政司左叅政用滂江溢飢民爲盜富室多懼其患檄郡邑勸富民出粟以貸飢者官爲立券期以來年償本蠲其役以爲之息民遂相安無事南贛諸府荒田糧六萬餘石有司歲抑取於民民不堪其弊辰以聞悉蠲其額坐累免歸六年召起爲北京行部左侍郎以老不任政日被顧問留京師者三年賜勅致仕踰年復召至京命督工武當未行疾作給驛

送還卒於常州毘陵驛舍年七十八辰爲人直諒多聞
有古節士風所著有國初事蹟子徵博覽能文年餘七
十猶力學不懈嘗著金華名賢傳藏於家

慈利縣丞汪益民

汪益民衡之開化人家貧居傍七賢堂讀書自娛元亂
不仕高皇帝龍飛徒步詣行在獻策歷陳開國紀綱
上嘉納之尋召赴闕勅授慈利縣丞守官廉介任滿乞
歸上憐其貧解龍袍賜之仍命有司優給衣食以終
其身

刑部尚書錢惟明唐

錢唐字惟明，象山人，博學敦古，行洪武元年舉明經。陳王道數千言，雅稱太祖意，特授刑部尚書，嘗召講虞書，升座而講。或糾唐草野之人，不知君臣之禮，唐正色曰：「以古聖王之道，陳於陛下，不跪不爲不敬。」二年，詔孔子春秋釋奠，止令行於孔廟。京師天下不必通祀，唐上疏諫曰：「孔子百王宗師，先儒謂仲尼以萬世爲主，天下通祀孔子，如祝聖壽報本之禮，不可廢也。」令遂止。二十三年，令儒臣修孟子節文，先是上覽孟子至土芥寇

譬之說大拂意謂非臣子所宜言議欲去其配享詔敢
諫者罪以不敬且命金吾射之唐抗疏入諫輿觀自隨
祖曾當箭曰臣得爲孟軻死有餘榮上見其誠懇命
太醫院療其箭瘡孟子配享得不廢又嘗諫官中不宜
揭武后圖忤旨待罪午門外終日上悟賜飯卽命撤
圖曰以旌直臣尋以耳聾乞歸卒唐秉心如丹屢批逆
鱗且死不顧以衛正學回欲墜之日於中天而千萬世
之陰霾昏翳不得以晦蝕之者唐之力也
濟南府知府方去矜克勤

方克勤字去矜寧海人五歲知讀書自辨章句十歲脯誦五經比長徧窮濂洛關閩諸書潛心於一卦一爻必欲驗諸行事至於天文地形禮樂刑政及制度文物之屬亦辨析歸於至當會海民爲變行省檄吳江同知金剛奴募民爲水兵克勤詣金剛奴謂曰民計窮而爲盜未爲盜者亦挺挺欲動奈何授之以兵是謂增盜非禦盜也金剛奴怒不答既而水兵果於中道殺護吏逃去從賊金剛奴踰垣走折一足始悔曰吾不從方先生言以至於此洪武二年詔立郡縣學以訓導徵克勤樂於

育才卽起應命負笈來從者數百人克勤據經陳義曲
暢旁通幾無毫髮遺憾聞者皆淪肌浹髓薰爲善良未
幾以母喪去諸生追送之學舍爲空朝廷聞其賢勅部
使者以書幣徵克勤兩詣政府以母老辭不聽就銓貢
試考覈入格列名第二上特命知濟南府錫之冠帶
以寵其行比至爲書一通懸之康衢諭上愛養元元
之意民有所不平詣前自言禁吏胥不得所問日引耆
耄坐語訊以得失聘前進士爲弟子師葺廟堂闢射圃
造弓矢樹正鵠日一再視學親爲正句讀較中否屬縣

之內社各立學學凡數百區弟子繫籍者二千人兵後
號爲最盛始有詔民間廢田者闢三載乃稅吏徼近功
不俟期歛之復以田定其科條民益惰田不增闢克勤
與民約定爲簡書列丁產爲三等每有徵發恒視書爲
則吏不敢並緣爲奸會郡城圯故事築以兵指揮使挾
貴人勢易民五六萬治之屬夏大旱民不得田哀號卽
工聲聞數里克勤奮曰民病不救惡用二千石爲審聞
中書請於上卽日詔罷先是不雨克勤袒跣徧禱羣
祠涕泣卧祠下誓不雨不還至是詔下民號呼而散大

雨如注。是歲大穰。民爲之歌曰。孰罷我役。使君之力。孰
成我黍。使君之雨。使君勿去我民父母。五年秋。隣境盡
蝗。克勤省愆。變食稽首告天。夜聞空中薨薨聲。燭之乃
飛蝗蔽天而過。郡獨有年。府召州縣官屬。皆役皂隸。往
往索賂。無厭。克勤下信符。置郵無敢不至者。復行其法
於封內。壹以信符。召民民得并力耕桑。襁負來歸者。相
望於道。戶增至六萬有奇。家有積粟。野無餓殍。牛羊雞
犬散被郊坰。省憲考績爲六府最。入覲。錫燕儀曹。仍還
舊職。瀕行。獎諭有加。且曰。政成當顯用。卿無何而爲程。

貢所誣被逮民號呼咽道隨行百餘里者將千數其子
孝儒上書政府願以身爲軍贖父罪不報竟謫後浦江
會空印事起吏又誣及之孝儒復伏闕上疏而克勤竟
死於京師年僅五十有一克勤爲政必先風化務以德
勝在官縱無事終日冠衣坐堂上召諸吏授以詩書法
律公庭之間不陳桮棬革鞭懸而不用晚年進修益力
晝之所爲夜則白之於天榮辱利害坦然視之不以爲
意所著有汗漫稿若干卷宋太史景濂志其墓

國子祭酒陶中立凱

陶凱字中立，台州臨海人，博學善屬文。洪武初，薦與修元史，選授太子書，尋除翰林應奉文字。三年，超陞禮部尚書。四年，請建奉先殿，乾清宮，左薦新及節序生辰祭，用常饌，行家人禮。上從之。凱每議禮，與棊城崔寬相可否，寬亦有學識，善論奏，是歲請選人專任東宮官，罷兼領職，庶輔導有所責成。上曰：古者不脩官，惟賢能是用，朕以廷臣有才望勲德者，兼東宮官，非無意也。嘗患廷臣與東宮官有不相能，遂成嫌隙，或生奸謀，離間骨肉，其禍非細。朕今立法，令府省

臺官兼東官贊輔之職父子一體君臣一心庶幾無相
衛之患五年凱言漢唐皆有會要記載時政及起居注
記言記事宜令臺省府各置銅匱簿錄聖旨及時政
依會要類編爲書上從之出爲湖廣參政致仕八年
召爲國子祭酒尋老復以參政致仕自稱耐父道人
上聞之怒曰何自賤也尋竟坐罪凱資性過人才高學
博識見卓遠爲文千言立就初游吳楚文多激慨中更
亂離去居深山中授經養親文多隱約明興應聘而
起凡稽古禮文事多凱論定又兼領翰林學士詔令封

冊歌頌碑碣時時命凱文章遂盛傳於世

廣東布政司叅政諸葛伯衡

諸葛伯衡蘭谿人少清介持名節從鄉先生游獲聞前輩緒論精求實踐鄉里咸推重之洪武初以薦授比平
維造局大使不以家累自隨出入無車馬遇雨輒草屨
行途泥中弗恤也遷趙州吏目州有建峯廟廟有青蛇
惑人凡入人家必有禍伯衡殺青蛇罪巫者民以不惑
以左春坊大學士董倫薦召問治道對以聖明之世紀
綱正而法度修民皆安業但庶耻之道輕耳上大悅

擢陝西布政司參議以道途遠近定轉輸之法民甚便之
後改廣東叅政卒於官金華杜桓爲立傳稱之爲清
修直諒之士云

國子監助教員廷琚瓊

貝瓊字廷琚崇德人性坦率不事邊幅而篤志好學博
通經史百家之言善爲文年四十人始領鄉薦張士誠
據吳累徵不就洪武三年被薦修元史同官服其史才
名重京師既成編受賞而歸六年以儒士舉至京師除
國子助教嘗慨古樂不作所謂成均徒有其名題作大

韶賦以見志。宋濂之爲司業也，建議於朝，謂當立五學，並祀舜禹湯文爲先聖。高皇帝不用其說，且黜辱之。然士大夫猶有避濂者。瓊乃作釋奠解以解之，文多不載。九年，遷中都國子助教，教勲臣子弟。瓊爲人文，行超越，素有名譽。雖將校武夫，皆知禮重。十一年致仕。明年卒於家。所著有清江文集二十卷，行於世。三子朝、翔、肅，俱以人才舉任世。其家學。

四川左叅政宣彥溫溫

宣溫字彥溫，會稽人。少穎悟，好學。襟度夷曠，家貧處之。

裕如、洪武初被召。上詢以治道、溫條對甚悉。上因問漢高祖殺功臣、光武全功臣、優劣何如。溫對曰：高祖殺功臣、功臣自殺；光武全功臣、功臣自全。上悅其言。授四川左叅政。居官有惠政。蜀人祠祀之。

太常博士陳世昌

陳世昌、錢塘人。力學。工古文辭。元至正初、以布衣入爲翰林編修、代祀海上。值道梗、遂居嘉興。授徒養母。張士誠據平江、屢致不屈。洪武初徵修禮書、欣然就道。授太常博士。尋以母喪辭歸。服闋、復徵至京而卒。所著有希

賢集

國子右司業王原禮嘉會

王嘉會字原禮嘉興人少博洽負俊聲元末累舉不第乃客授松江爲人溫淳和緩後進樂就講論鼎來者修甌戶恒滿上海令康伯愚見其詩詞敦雅敬禮之引爲上賓使以文章飾已吏事會詔舉明經嘉會應聘至京高皇帝命賦詩應制稱旨復試其文賞異之除授翰林院檢討尋陞國子右司業時宋訥爲祭酒太學生常數千人嘉會與訥及左司業龔敷嚴立楷範三人者春秋

已高鬚髮，髯如正其衣冠，旦夕端坐，諸生雲集階下，肅然望而畏之。以是士類率教，多所造就。吏部取擢，輒能其官。上知其勞，眷待殊厚。老疾乞歸，優詔調治。未幾卒於官舍，年八十餘。上深嗟悼，給驛護喪還葬，發引之日，詔所在官司備禮祭之，蓋異數也。

文華殿大學士鮑仲孚恂

鮑恂，字仲孚，自崇德徙嘉興之西溪。父德歸，安丞。恂三領元江浙省鄉試，學士張翥、御史劉彥博薦爲翰林。不就。洪武初，禮部舉吉安余詮、高郵張長年及恂。明經老。

儒達於治體可備顧問遣使召至京師賜坐顧問一日
上召恂等命爲文華殿大學士輔導東官恂等固辭
上諭之曰以卿等年高故授此職煩輔導東官耳免卿
早朝日晏而入從容侍對不久隨卿致仕歸鄉以終餘
年庶不負平生所學於鄉里亦有光榮恂等復固辭翼
日放歸恂受易臨川吳澄得其旨著易傳大義及西溪
漫稿行世學者尊之曰西溪先生

長史朱伯清

朱廉字伯清義烏人自少刻苦勵志淹貫經傳悉領要

義旣而學文於黃潛遂以文章名家國初知府王宗顯
器其材辟爲郡學師移長釣臺書院洪武三年詔修元
長聖朝日曆召爲纂修官書成拜翰林編修八年乘輿
巡幸中都命蕪臯駕比至滁州進詩十首上覽而大
喜曰佳詩朕爲汝和有頃召蕪賜和詩六首當時以爲
榮旣而授經楚府尋陞長史以贖致仕歸窮經講誦極
研聖學嘗取朱熹語類摘其精義名曰理學纂言其爲
文謹嚴精密有文集二十七卷

宋無逸玄僖

宋玄僖字無逸餘姚人少有至性嗜學多關覽外隱隱若不足而其中敏悟絕人元至正間中乙榜授繁昌諭才十九日卽弃歸是時海內大亂玄僖無復用世志過而遁諸山澤家貧無衣食資唯授徒以自給樞省嘉其苦節辟爲鄉邦文學不行明興以史事徵乃出應詔事竣復命典福建鄉試稱有鑒別晚窮濂洛之學爲文縝密有尺度詩亦清遠有文集行於世

教諭趙撓謙議

趙謙字撓謙餘姚人初名古則幼孤貧寄食山寺與學

佛者同學書克已復禮之

用。工準的聞金華鄭四

表學有根源。往師之得其傳。歸隱臨山。萬書閣。潛心大業。飢寒迫之。其容粹如也。國初徵修正韻。稍試其學。舉罷歸。築考古臺。述六書之旨。注聲音文字通。及易學。撰綱諸書。凡三百餘卷。大臣有薦議者。上曰。吾欲老其才而用之。後召爲瓊山教諭。作瓊臺布學。範教化大行。嶺表以南。稱爲趙夫子。議於勢利。澹然而直。義所在。目無王公。然卒以此厄窮。不悔也。卒於番禺。年四十五。國子博士錢子予宰。

錢宰字子予，會稽人。吳越武肅王鏐之後，博學能文。洪武三年，以儒士舉爲國子助教。時部邑弟子員貢人太學者，設爲教條，限以歲月，責其功效。助教與博士程其課業而升降之。旣升舍，乃得選登仕籍。然士方畏懼，爲法所繩，惴惴莫有樂學者。宰爲人莊重和易，諸生無不就之，輒戀戀不能舍。以是爲時明師。未幾，以年老陳情乞休。上許之，勅授文林郎、國子博士致仕。宰旣歸，精力猶壯。宣上德意，有從之遊者，輒開廸不倦。迨近宗之二十七年四月，上觀蔡氏書傳、象緯運行，與朱子

詩傳相侔其他註說與鄧陽鄒季友所論間有未安者
遂詔徵天下儒臣定正之於是兵部尚書唐鐸等舉宰
及致仕編修張美和致仕助教靳觀等並遣行人馳傳
徵之至京師入見上語以正定書傳之意命翰林學
士劉三吾總其事禮遇甚厚時建酒樓初成賜宰等鈔
宴其上人各露醉獻詩以謝上覽之大悅復遣禮部
尚書任亨泰諭旨諸儒有年老願歸者先遣之宰商最
高與衆皆請留亨泰以聞上喜曰朕知諸耆宿終能
成朕志其善視之九月書成賜名書傳會選命亨泰梓

行之賜宰等宴及鈔令馳傳歸其鄉又三年宰乃卒年九十六初宰嘗病近代新聲大繁刻意古調擬漢魏而下諸作及古詩十九首詩且各補其未純者詞林稱之所著有臨安集

監察御史周觀政

周觀政山陰人洪武中以薦教授九江擢監察御史嘗監奉天門有中使將女樂入觀政止之中使曰有命觀政曰有命亦不可中使怒而入頃之出報曰可使之出觀政亦不從曰必面奉詔已而上出謂觀政曰內間

慶賀侑食之樂廢缺欲令內人肄習吾已悔之御史言
是朝綱爲之肅然當時以北東方彙脩永樂初出爲江
西按察僉事時安南初下觀政建言四事曰修明政教
慎簡征科革正衣冠作新學校取人上卽賜施行官
至觀察使卒

穎上縣知縣車信夫誠

車誠字信夫餘姚人洪武初以賢良方正徵授知穎上
縣奉職庶謹以誠信治民政化大行考最遷知光州益
勤撫字出民於水火而輕靡之俗當時稱循良第一秩滿

告老歸優游林下復十餘年而卒

江西按察僉事丁叔寬豫子麒麟附

丁豫字叔寬海鹽人洪武初以儒術聞勅諭幣聘入京高祖召見問天下治否對曰盜賊已息但恐復生今日之治願以安民爲本稱旨授江西按察僉事詳刑慎法澤被於民民頌之不衰長子麟字彥禎以詩文名貢入太學庚申命往荆楚訪求賢良事竣告省歿於第次子麟字彥祥乙丑進士歷工科給事中監察御史彈劾百僚風聲赫赫無寧見法其心慨然不平必直之而後已

人稱真丈夫。

國子學正王彥貞

王桓字彥貞，慈谿人。洪武四年，有司以通經學古薦於朝。高皇帝召見便殿，問桓處鄉里好惡何如。桓對曰：「善者好之，不善者惡之。」一言稱旨，上遂呼爲老學士。乃命與尚書魏杞、山錢惟明、學士宋景濂講論治道。踰年，授國子學正。未幾，轉河南盧氏縣令，政教一新。民懷其德。十二年，致仕歸，卒於家。先是，桓家居鄉，人有不平事，無大小，咸取決於桓，無不得其情者，遂稱爲明白先。

生其學不事章句務得於心識者謂其克繼虞賀杜樓
之絕學所著有明白先生集藏於家

大興同知劉昭甫子華

子鐸從孫棟附

劉子華字昭甫山陰人洪武初以明經薦太祖召賦

常遇春輓詩子華立賦曰揮戈十載定河山忽報星沉
易水灣馬首西風旌旆捲天涯落日凱歌還功成楚漢
興亡際名在韓彭伯仲間聖主恩功心獨苦黃金直欲
鑄真顏大稱旨授大興同知子鐸廷對第三人官編修
卒從孫棟字元隆正德初進士選庶吉士授編修嘉靖

初議大禮忤旨杖闕下稍遷左中允復忤執政出叅湖
省終南京兵部侍郎歷官四十年所居蕭然如隱者孝
友和易無少長皆樂親之

右副都御史韓伯時宜可

韓宜可字伯時山陰人幼好學精敏淹博磊落有大志
洪武初以貢授山陰文學召拜監察御史持風紀不避
權勢時左右御史大夫陳寧胡惟庸中丞涂節侍上
坐從容燕語宜可直前長跪出懷中彈文劾寧惟庸節
險惡如忠奸佞似直恃恩怙寵內懷反側乞斬三人首

以謝天下。太祖怒曰：「三人事朕盡職，豈有反側之心？快口御史排陷大臣，下錦衣衛拷訊，尋釋之，出爲江西按察司僉事。」十三年歸朝。上賜沒官男女，宜可不受。且以爲非聖人政，卽上疏極論。罪人不孥，古之制也。有事隨坐，法之濫也。官吏有罪，厥辟勿省，國之典也。罰其妻子，何居？况男女人之大倫，婚姻踰時，尚傷和氣，合門連坐，豈聖明所宜？上曰：「汝言是著爲令。」後坐事將辟，上御謹身殿，親鞫之。時天朗氣清，忽雷火遶殿。上驚，而言曰：「得非枉此人邪？」雷乃息。宜可獲免。所上二十餘

事悉報可。未幾，以例罷歸。十九年，行取到京，命撰祭鍾山大江文，諭日本，征烏蠻，詔作堯舜禹湯傳，賢論稱旨。特除山西右布政使。未幾，以事安置雲南，以薦起爲雲南叅政。尋陞都察院右副都御史，在臺以鋤奸顯忠爲已任，百僚悚惕，不敢犯。無何，卒於官。時大星墜地，檉馬皆驚。

王教授俊華

王俊華，台州人。洪武初，以明經薦爲府學教授。時干戈甫定，人未知學。俊華正己率物，誨諭詳懇，旦夕督功課。

若父兄之於子弟時分俸以資不給者官終太子贊善
戴冠云自國家設教以來文學行誼無出俊華右者真
一時師儒之楷模也

福建僉事謝原功肅

謝肅字原功上虞人學問該博目無不見之書洪武初
以明經薦授福建按察司僉事克持風紀察案肅然所
著有密庵稿與唐肅齊名時號會稽二肅

兗州府知府胡斯美惟彥

子伯順附

胡惟彥字斯美餘姚人居鄉以耆德見稱元季隱居避

世明興舉遺逸召見上太平頌上覽而悅之命賦早
朝詩十章立就上益大悅拜湖廣叅政懇辭改兗州
知府在郡一年政平訟理百姓皆愛戴焉卒於官子伯
順學篤行修鄉黨稱爲雲巢先生

教授崔斯立植

崔植字斯立鄆人治春秋得聖人心法辨論公毅左氏
三傳得失歷歷如指掌究極羣史平居儀度整肅不假
修飾而規範自然洪武七年薦爲郡學教授後調處州
以成就後進爲務受業者日衆必傾極底裏隨其材而

導之卒於官。植文學德行卓絕流輩。一時碩儒莫不想聞其風采。自號丹山樵者。有雜著文集若干卷。

黃岡縣知縣徐宜叔誼

徐誼字宜叔。壽昌人。少治春秋通史學。累舉不第。太祖龍飛。乃杖策歸朝。每叅謀議。時征陳友諒。奉命招撫。使回授承務郎。知黃岡縣事。兵火後。市里蕭條。誼招集流民百廢俱舉。未幾解官歸。洪武十七年。以明經舉。擢知鎮江府政。爲三輔之最秩滿。惟圖書數秩自隨。調吉安府。獄有繫囚。皆累歲逋官租。不能償者。誼出俸金五

百貫代償而縱之雪冤理枉削除積弊政化一新後以疾卒於官民皆路祭巷哭執紼送柩者至數千人

教授俞景淵深

俞深字景淵桐廬人洪武初以鄉貢入太學時高皇帝幸學講中庸二字累數萬言深得啟沃之義因稱之曰天下能說書生俞深歷任寧德阜平汝上儒學教諭皆有成效以大學士楊溥薦陞建寧府教授三典文衡取士得人正統七年卒於官深博通五經究極諸子篤厚端謹處家一規文公家禮所著有範疇解發明蔡九

卷之五 雜文十卷 雜詩十卷 載於家

兵部侍郎徐宗實

徐屋字宗實黃巖人。負才抱氣有經綸天下之志。元末厭世不仕。洪武初應薦入朝。數被顧問。敷對明切。皆中時宜。上喜。將授憲職。屋以母老辭。乃除銅陵簿。屋又請迎母就養。忤旨。謫役湘陰驛。未幾選教附馬。能以師道自尊。召見獎諭。擢蘄州府通判。奏發粟二十萬以活飢民。春漲病隄。屋相度原隰。大興築捍之役。部使者以爲妨農勞民。屋言他役誠妨農。水不退則田不可耕。妨

農孰甚焉。且今有田者量募貧力，飢人得哺，正所謂佚道使民。曷爲勞哉？卒就其庸民，以爲利。屬邑有樓貞婦，奏乞旌表。禮部謂前朝事，不允。臣言：死生有間，則比干之墓誰封？禮官不能奪，從之。官終兵部侍郎。

訓導趙德純宜生

趙宜生，字德純，宋之宗室也。家於餘姚，粹於經史文藝之學。時方大亂，混迹芻牧間，自號騎牛野人。國初辟爲邑學訓導，宜生欣然就職，勸飭指誨，聞者鼓動。姚江學士繇此彬彬焉。

陝州判官梁仲仁大舉

梁大舉字仲仁錢塘人自號梅谷刻厲尚風節洪武初以人材徵召對稱旨授陝州判官卓有異政清白聞遠邇以母老辭歸永樂初召入賜勅以舊職致仕宴勞特厚優游林下年七十三卒大舉家素饒裕而自奉儉約好士喜施長身高論在衆人中昂然如野雀之在鷄羣也翰林檢討王洪爲梅谷先生傳

教授徐大章一夔

徐一夔字大章天台人自少學文卽期以載道非六經

所存不復輕置念慮含蓄既久燁然以文名江南洪武六年以儒士薦授杭州府儒學教授通經學古當國家肇開學校而克嚴軌範以身率之召入史館纂修元史詔製靈谷寺碑稱旨賜莽衣綵段繼得實授再蒞益申條教一時學徒成就試之有司多獲舉貢至今稱教授之賢難乎其繼云

左布政王希陽廩

王廩字希陽麗水人爲人修整博通五經尤精於易雖子史百家天文律曆兵刑等書靡不淹貫洪武初薦入

翰林纂修元史書成授太子說書官至陝西左布政使
所著有交山集迂論史纂南征錄四書詳說又精於音
樂以琴者有道之器君子之所不廢時一撫之嘗製風
木吟曲以擬倚蘭字宗韓擇木兼工篆籀其得處自以
李陽冰不逮也當時目爲通儒

兩浙名賢錄卷之十二終